

在深水埗報案室工作是對我這個剛出警校的警察最大的挑戰，因為這裡號稱全港報案室中案件數量最多及類型最多樣化。然而，火爆、不滿、委屈、沒有一絲暢快感和滿足感，就是報案室人員每天的內心讀白。而最棘手的案件莫過於家庭糾紛。

「我有交稅架，你份糧係我出俾你架！要你地做少少野都咁麻煩！」

「即刻！你老闆我無咁多時間等，轉個擔保都咁慢，你估我好想嚟差館對住你地呀！」

「問咁多問題，有時間問，不如喺臨幫我去拉人啦！」

「排咩隊呀，我急呀，我先！你同我彈開啦！哎哎哎，唔好再郁手啦！呢度係差館，唔好打交！」

一如既往的喧鬧，這哪裏是凌晨三點的樣子？

「做乜野？」助理值日官 (ADO) 聽見吵鬧聲越來越大，直接從座位站起來：「你地當呢度係街市呀？全部同我收聲唔好再同我郁手郁腳，呢度係警署，要報案嘅唔該排隊，亦唔該你地尊重我地啲同事！」

總算安靜了下來，但就那麼幾秒之後……

「就係呢個人渣，我個女為左佢自殺！我個女放棄所有野，連酒席都訂埋，未婚夫都唔要，都死過嚟跟住佢。」

「你話飛佢就飛佢，你係唔係人呀，你害到我個女依家為左你自殺……」

報案的媽媽情緒越來越崩潰，又哭又鬧，完全聽不進我說的話。突然，她跳起身，手顫抖著指向我：「登記！登記！登記有 Q 用咩！你地班差佬仲唔去搵，快啲去搵啦！」

「你提供啲資料越詳細，我地就越快搵度你個女。你個女條命依家掌握喺你手上。」 ADO 大聲喝止。

「阿軒，帶佢地過嚟，即刻通知 Commander 關 Sir。電台！叫所有同事留意自己份嘅大廈天台，睇下有無可疑女子喺上面。」

「有！」（我心想……深水埗起碼有成五百個天台㗎…）

ADO：「你地喺邊度得知個女想自殺？啲相喺邊度嚟架？最後同個女聯絡嘅係邊個？幾耐之前？」

這對父母聽到 ADO 的交代，總算暫時安靜下來，兩人相互安慰著抹眼淚。ADO 則盯著年輕的男生，要求他交代事情的始末，男生在 ADO 的壓力下才不情不願地開口。

原來女生已經向她的朋友們發了遺言，她的父母通過她朋友得知消息後，才找到這位男生，想要他勸回女兒，但男生態度相當不屑，執意要跟女生分手，只給她父母提供了女生發給他在天台割脈的照片，無奈的父母著急之下只能拉著他來了警署。

ADO：「請你先將你個女近照同佢喺天台嘅相提供比我地先。」

男朋友：「阿 Sir，如果無咩野，我諗我可以走了啦掛。」

「你害到我個女咁，我個女為左你同未婚夫分手，依家你竟然想一走了之，完全唔理佢生死，你……」說著便拉扯了起來。

小隊指揮官關 Sir：「喺未搵到事主，確定她安全之前，你必須留低協助我哋警方！」

男朋友：「佢一直喺 WhatsApp 同我講要喺返埋一齊，係咁話我哋佢，不過阿 Sir 佢已經係我個 Ex-Girlfriend 啦，唔該。」ADO 突然心生一計：「你介唔介意俾我哋用你個 WhatsApp 同你女友溝通？」男朋友：「可以，但係你哋唔可以代我應承同佢結婚囉。」

隨住一個又一個 Message，你來我往，一班報案室同事，不論男女，都絞盡腦汁，將畢生「氹女仔」嘅說話技巧都展示出嚟，我心想：「原來冧女嘅野，唔係淨係用嚟我果個日日炸型話我請唔度假陪佢嘅女友身上，仲可以要嚟救人！」

終於，另一邊傳來 WhatsApp 回覆；「我想見你……」「BINGO！」大家歡呼起來。

紛擾終於停止，報案人也跟著去找事主了。不久電台傳來消息，成功救下事主並送往了醫院，ADO 於同事們成功救回女事主之後，打電話向事主勸說一番，其中一句我很深刻：「阿妹，你咁執著都無用，佢既然去意已決，又何必用死嚟挽留呢？放過人哋，其實即係放過自己！」。

然而，報案室內仍有很多市民等著報案，整個報案室又開始喧鬧起來。

同樣的忙碌，不一樣的心情，喧囂的夜晚，好像看到了一抹陽光。我是一個小警察，只是一個小小的警察。帶著信仰、帶著榮譽，從陽光中走來！

幾個月後，一家三口竟然送了一個生果籃到報案室前台，女生還笑著帶來了一句話：「多謝阿 Sir 你當日提醒我個句說話，『放過人哋，其實即係放過自己！』」作為警察的我們要緊記這句話，全心全意去面對自己作為警察的職責，對工作上所接觸到的漫罵和吵鬧一笑置之，這些都只會是成長過程中的回憶而已。